



齋 鑄 讀

廿 畫

四 世



序

余受性椎魯寡所嗜慕少年讀書里中藏書之家借覽無虛日及壯遨遊吳越來往燕齊蹋通德之門窺禮堂之奧左右采獲漸成撰述五十以後始抵粵東一官匏繫非吾所好趨走之暇閉門却掃於是重取經史百家朝研夕稽證其異同辨其得失以聲音文字通其原以轉寫譌舛窮其變勿敢嚮壁虛造勿敢勦襲陳言淺見眇聞聊以自適後之覽者其或諒斯道光元年十二月廿一日臨海洪頤煊識

案先生字筠軒与兄坤煊弟震煊皆以績學稱而先生尤博綜羣籍名

大最顯受知阮文達公以嘉慶辛卯拔貢就銓州判需次廣東偃蜷

說所著尚有宮室答問等書咸豐辛卯上元日鄉後學會稽李慈
銘長孺甫識于都門愚舍



又案先生此書儀徵相國已最其說經者刻入學海堂經解中其
他如禮經宮室答問二卷孔子三朝記注二卷及詁經精舍文集所載
禹貢北過降水至于大陸故禹都陽城考曾氏一貫論釋魯郊七
經孟子攷文補遺跋諸篇皆博稽精核卓然可傳震煊字百里拔
貢生与先生同佐儀徵編經藉卷誌者有夏小正疏義四卷及詁經精
舍文集所載禹貢北過降水至于大陸故論語過位解孔子去魯證顏
氏復禮論曾氏一貫論中庸說性情說格物說夏小正昏旦星說鞠則
見解漢經師家法攷六朝經術派論共十二篇亦皆見學海堂經解精
奧不讓其見也中春望後一日阮客文記時館商城相國家

讀書叢錄總目

咸豐十一年春正月十日北京錢七齋購于嚴祥



卷一

易 尚書

卷二

周書 毛詩

卷三

周禮 儀禮

卷四

禮記 大戴禮

卷五

春秋左氏傳

卷六

國語 公羊傳 穀梁傳

卷七

論語 孝經 孟子

卷八

爾雅 經總類

卷九

方言 說文

卷十

小爾雅 釋名 廣雅 字林

卷十一

玉篇 文選注 一切經音義

卷十二

五經文字 九經字樣 廣韻 汗簡

鐘鼎款識 續鐘鼎款識

卷十三

老子 晏子春秋 孫子 墨子 鄧析子

卷十四

列子 莊子 公孫龍子 慎子 鶡冠子

韓非子

卷十五

荀子 呂氏春秋 賈誼新書

卷十六

淮南子

鹽鐵論

法言

白虎通

卷十七

史記

卷十八

史記

卷十九

漢書

卷二十

漢書

卷二十一

漢書

卷二十二

後漢書

卷二十三

後漢書

卷二十四

宋元刊本

男瞻墉校字

道光二年正月初吉廣東
省城西湖街富文齋刊行

讀書叢錄卷一

王弼易注

隋書經籍志周易十卷魏尚書郎王弼注六十四卦
六卷韓康伯注繫辭以下三卷王弼又撰易畧例一
卷釋文序錄亦云王輔嗣止注大經講者相承用韓
注以下續之頤煊案南齊書陸澄傳時國學置鄭王
易澄謂尚書令王儉曰弼於注經中已舉繫辭故不
復別注今若專取弼易則繫說無注是其時尚未以
韓注續也

經分上下篇



臨海洪頤煊



易緯乾鑿度陽道純而奇故上篇三十所以象陽陰道不純而偶故下篇三十四所以法陰頤煊案陽象天道故以乾坤天地爲始以坎離日月爲用陰法人事故以咸恒男女爲始以既未濟水火爲用天道有屯亨故以泰否居中人事有得失故以損益居中

文王作爻辭

釋文序錄宓犧氏始畫八卦因而重之爲六十四文王拘於羑里作卦辭周公作爻辭頤煊案三國志管輅傳上追文王六爻之旨下思尼父彖象之義此以爻辭亦文王作

卽鹿

屯六三卽鹿无虞釋文王肅作麓云山足頤煊案風俗通山澤篇麓山足也詩云瞻彼旱麓易稱卽麓无虞虞翻曰艮爲山山足稱麓本皆作麓

童蒙來求我

蒙彖匪我求童蒙童蒙求我釋文一本作來求我惠氏棟周易古義引呂氏春秋勸學篇高誘注易曰匪我求童蒙童蒙來求我以證經文本有來字王氏引之經義述聞又據王弼注蔡邕處士圈叔則碑謂漢魏時經文皆有來字頤煊案華嚴經音義易稱蒙卦者謂童蒙來求我非我求童蒙求上亦當有來字

貞丈人

師貞丈人吉釋文貞丈人絕句頤煊案說文貞卜問也周禮天府鄭注鄭司農云貞問也易曰師貞丈人吉問于丈人大卜鄭注貞之爲問問於正者必先正之乃後問焉易曰師貞丈人吉貞又通作偵禮記緇衣易曰恆其德偵鄭注偵問也

輿尸

六三師或輿尸王注以陰處陽以柔乘剛進則无應退无所守以此用師宜獲輿尸之凶頤煊案周禮夏官輿司馬鄭注輿衆也左氏成二年傳無令輿師淹於君地杜預注輿衆也爾雅釋詁尸主也謂或以衆人主師則无功故凶

尙德載

小畜上九尙德載阮尙書校勘記古本載上有積字頤煊案王注體巽處上剛不敢犯尙德者也爲陰之長能畜剛健德積載者也注本有積字虞翻曰坎雲復天坎爲車積載在坎上故上得積載亦當有積字

匪其彭

大有九四匪其彭釋文子夏作旁頤煊案王注旁謂三也王弼本亦作旁釋名釋兵篇彭排彭旁也在旁排敵攻禦也邢昺爾雅疏今謂之旁牌墨子備城門篇若彭有水濁非常者必穴土也彭卽旁字

朋盍簪

豫九四朋盍簪釋文徐側林反子夏傳同疾也鄭云
速也惠氏周易古義子夏鄭立張揖王弼皆訓簪爲
疾或云速明非簪字頤煊案釋名釋首飾篇簪髡也
以髡連冠於髮也說文簪作先髡替替銳意也皆與
疾速義相近

貫魚

剝六五貫魚以宮人寵王注貫魚謂此衆陰也駢頭
相次似衆陰也頤煊案考工記梓人鄭注連行魚屬
賈疏魚唯唯行相隨故謂之連卽此貫字之義

口實

頤自求口實山井鼎周易考文作自求口食頤煊案
鄭注坤載養物而人所食之物存焉觀其求可食之
物則貪廉之情可別也鄭本作食

朶頤

初九觀我朶頤王注朶頤者嚼也正義朶是動義如
手之捉物謂之朶也頤煊案朶頤卽染頤說文染从
水朶聲徐鍇曰說文無朶字朶爲朶字之譌朶卽染
字之省釋文朶京作揣揣當是朶字之譌儀禮公食
大夫禮以辯擣於醢鄭注擣猶染也卽其證

士夫

大過九五老婦得其士夫頤煊案荀子非相篇婦人
莫不願得以爲夫處女莫不願得以爲士楊倞注士

者未取妻之稱易曰老婦得其士夫

麗乎土

離彖百穀草木麗乎土釋文王肅本作地頤煊案初學記卷二一切經音義卷六引易皆作麗於地說文麗字注引易曰百穀草木麗於土宋本說文作麗於地皆同王肅本

咸其輔頰舌

咸上六咸其輔頰舌釋文孟作俠頤煊案說文輔頰也廣雅輔謂之頰輔頰同物不應連名當從孟喜作俠淮南說山訓高誘注俠輕也俠舌謂輕言與下滕口說義正相應

肥遯

遯上九肥遯无不利頤煊案後漢書張衡傳利飛遁以保名李賢注淮南九師道訓曰遁而能飛吉孰大焉王注憂患不能累矰繳不能及是以肥遯无不利字亦當作飛

不詳也

大壯上六象不能退不能遂不詳也釋文詳審也鄭王肅作祥善也頤煊案正義祥者善也進退不定非爲善也故云不祥也正義本作祥虞翻曰乾善爲祥不得三應故不祥也本亦作祥

箕子之明夷

明夷六五箕子之明夷釋文蜀才箕作其頤煊案王注最近於晦與難爲比險莫如茲而在斯中猶闇不能沒明不可息注亦以箕爲其讀子爲茲正義箕子之明夷者六五最比闇君似箕子之近殷紂非注義若濡有愠

夬九三獨行遇雨若濡有愠无咎王注若不與衆陽爲羣而獨行殊志應於小人則受其困焉遇雨若濡有恨而無所咎也頤煊案愠當作緼禮記玉藻緼爲袍鄭注緼謂今纊及舊絮也言遇雨若濡有緼絮可以禦溼故无咎旣濟濡有衣袷王注濡宜曰濡衣袷所以塞舟漏也袷以塞舟漏緼以禦雨其義同也

金柅

姤初六繫于金柅釋文說文作楡云絡絲跌也讀若昵王肅作捉從手頤煊案說文屎箕柄也重文作柅方言箕棖也郭璞注所以絡絲柅本一物正義云王肅之徒皆爲織績之器婦人所用字亦當作柅釋文云從手作捉者譌也太平御覽卷八百二十五引易作捉卽陸德明所見王肅本

以杞包瓜

九五以杞包瓜正義子夏傳作杞匏瓜薛虞記云杞性柔刃宜屈撓似匏瓜頤煊案王注包瓜爲物繫而不食者也正義匏瓜爲物繫而不食則注疏本皆作

以杞匏瓜

其形渥

鼎九四其形渥頤煊案周禮司烜氏鄭注屋讀如其刑剗之剗漢書敘傳底剗鼎臣服虔曰周禮有屋誅誅大臣於屋下不露也易曰鼎折足其形渥凶字當從鄭本作其刑剗虞翻曰渥大形也亦當與服鄭本同

女歸吉也

漸彖女歸吉也釋文王肅本作女歸吉利貞頤煊案下文進得位往有功也是釋利字進以正可以正邦也是釋貞字其位剛得中也止而巽動不窮也是申

釋進得位二句之義據文義當有利貞二字

自藏也

豐上六象自藏也釋文衆家作戕馬王肅云殘也頤煊案淮南說林訓高鳥盡而良弓藏高誘注藏猶殘也

用拯馬壯吉

渙初六用拯馬壯吉山井鼎考文古本吉下有悔亡二字頤煊案虞翻曰坎爲馬初失位正動體大壯得位故拯馬壯吉悔亡之矣虞本吉下有悔亡二字

鬼方

既濟九三高宗伐鬼方惠氏周易古義商時鬼方周

時荆楚之地引汲郡古文武丁三十二年伐鬼方次于荆三十四年王師克鬼方氏羌來賓爲證頤煊案鬼方不止荆楚之地當連西戎言之後漢書章帝紀克伐鬼方開通西域西羌傳武丁征西戎鬼方三年乃克故其詩曰自彼氏羌莫敢不來王文選趙充國頌李善注鬼方於漢則先零戎也

幽明

繫辭上是故知幽明之故原始反終故知死生之說韓注幽明者有形无形之象頤煊案淮南原道訓幽兮冥兮應無形兮漢書楚元王傳則幽冥而莫知其原師古曰幽冥猶暗昧也幽明卽幽冥本亦作窈冥老子道經窈兮冥兮其中有精莊子在宥篇至道之精窈窈冥冥素問從容論吾問子窈冥王砮注窈冥謂不可見者窈本又作杳皆同聲通用字

旁行而不流

旁行而不流頤煊案此五字當在與天地相似句下與天地相似旁行而不流故不違知周乎萬物而道濟天下故不過樂天知命故不憂安土敦乎仁故能愛文義皆相對旁並也史記旁河旁海字皆作並旁行而不流禮記中庸所謂道並行而不相悖也

故君子之道鮮矣

故君子之道鮮矣釋文鮮師說云盡也頤煊案詩瓠

葉有兔斯首鄭箋斯白也今俗語斯白之字作鮮齊魯之間聲近斯爾雅釋詁鮮善也釋文本或作誓沈云古斯字詩皇矣王赫斯怒鄭箋斯盡也故師說從之

莫大乎著龜

莫大乎著龜釋文莫善本亦作莫大盧氏文昭疏證漢書藝文志白虎通著龜篇何休公羊注賈氏儀禮疏皆作莫善頤煊案虞翻曰離爲龜乾爲著月生震初故成天下之亶亶者莫善著龜也本亦作善

何以守位曰仁

繫辭下何以守位曰仁釋文曰人王肅卞伯玉桓玄明僧紹作仁頤煊案漢書食貨志後漢書蔡邕傳引皆作仁文選張平子東京賦守位以仁薛綜作人禮記禮運鄭注何以守位曰仁釋文本亦作人

蒼筤

說卦震爲蒼筤竹釋文筤或作琅通頤煊案藝文類聚卷八十九初學記卷十引易曰震爲蒼琅竹蒼琅言其竹色之青似琅玕漢書五行志木門倉琅根師古曰銅色青故曰倉琅說文無筤字

爲白

巽爲白正義爲白取其風吹去塵故絜白也頤煊案白卽帛字賁六五束帛戔戔虞翻曰巽爲帛爲繩是

虞氏易作爲帛也詩六月白旆央央孫炎爾雅注作帛旆央央禮記玉藻大帛不綉鄭注帛當爲白聲之誤也白帛古字通用

百兩篇尙書

漢書儒林傳世所傳百兩篇者出東萊張霸分析合二十九篇以爲數十又采左氏傳書序爲作首尾凡百二篇篇或數簡文意淺陋頤煊案論衡感類篇伊尹死時天何以不爲雷雨應曰以百兩篇曰伊尹死大霧三日正義引尙書緯孔子求書得黃帝立孫帝魁之書定可爲世法者百二十篇以百二篇爲尙書十八篇爲中候其說皆本於張霸

古文官書

隋書經籍志古文官書一卷後漢衛敬仲撰史記儒林列傳正義漢書儒林傳師古注俱引作衛宏詔定古文尙書頤煊案衛宏從杜林學林前於西州得漆書古文尙書一卷韓愈科斗書後云李服之者陽冰子授予以其家科斗書孝經衛宏官書兩部合一卷官書卽漆書以其詔定故亦稱官書新唐書藝文志作衛宏古文字書者誤也說文勸字注引衛宏說史記五帝本紀集解引衛宏云摯立九年而唐侯德盛因禪位焉皆古文尙書說

尙書逸篇

禮記坊記正義鄭不見古文尙書漢時別有尙書逸
篇四月太子發上祭于畢以下三篇之事頤煊案此
今文泰誓之辭泰誓後得故正義以爲逸篇隋書經
籍志有尙書逸篇二卷太平御覽卷七十引尙書逸
篇堯子丹朱不肖舜使居丹淵故曰丹朱卷五百三
十一引尙書逸篇嗚呼七世之廟可以觀德卷五百
三十二引尙書逸篇太社唯松東社唯栢南社唯梓
西社唯栗北社唯槐天子社廣五丈諸侯半之皆是
曰若稽古

堯典曰若稽古帝堯惠氏棟尙書古義鄭康成曰稽
同古天也言能順天而行與之同功孔安國曰若順
稽攷也能順攷古道而行之者帝堯此說本賈侍中
引高貴鄉公幸太學命講尙書鄭玄王肅二義頤煊
案史記三王世家朕承祖考維稽古褚先生解曰維
者度也念也稽者當也當順古之道也此卽賈馬及
王肅所本周書周祝解天爲古虞氏易天爲古詩玄
鳥古帝命武湯鄭箋古帝天也後漢書李固傳臣聞
君不稽古無以承天皆同鄭說

放勳欽明

曰放勳欽明文思安安傳言堯放上世之功化而以
敬明文思之四德安天下之當安者頤煊案傳以欽
明文思爲四德本於馬融注見釋文後漢書馮衍傳

李賢注尙書考靈耀曰放勳欽明文思晏晏文選魯靈光殿賦張載注尙書曰放勳欽明四字皆作一句讀

嶠夷

宅嶠夷釋文馬云嶠海隅也夷萊夷也頤煊案說文土部嶠夷在冀州陽谷立春日日值之而出尙書曰宅嶠夷此古文說也山部嶠山在遼西一曰嶠鐵嶠谷也此今文說也史記夏本紀索隱今文尙書及帝命驗並作禺鍤鍤古鐵字遼西地禹貢時屬冀州周禮職方屬幽州馬融注以青州嶠夷當之非是

南交

宅南交傳南交言夏與春交舉一隅以見之正義經冬言幽都夏當云明都鄭云夏不言曰明都三字摩滅也頤煊案宅嶠夷曰陽谷是一地二名宅西宅朔方統言之必實舉其地所在曰昧谷曰幽都宅南交謂居南方交阯之地文義已著不必有曰明都三字

舜典

舜典王氏鳴盛尙書後案孔壁所得古文本有此篇後其篇亡佚撰偽古文者因割堯典慎徽以下爲舜典當時馬鄭傳古文尙書二典皆合爲一篇名堯典不名舜典歷引羣書以證之頤煊案周禮春官序官注鄭司農云堯典曰帝曰咨四岳有能典朕三禮僉

日伯夷詩時邁鄭箋書曰歲二月東巡守至於岱宗
柴望秩於山川徧於羣神正義書曰以下堯典文公
羊十四年疏引堯典曰在璿璣玉衡太平御覽卷八
百四引此句亦作堯典亦皆馬鄭王本二典合爲一
篇之證

金作贖刑

金作贖刑正義古贖罪皆用銅漢始改用黃金少其
斤兩令與銅相敵故鄭玄駁異義言贖死罪千鍰鍰
六兩大半兩爲四百一十六斤十兩大半兩銅與今
贖死罪金三斤爲價相依附頤煊案漢書律歷志二
十四銖爲兩十六兩爲斤千鍰通分之爲六千六百
六十六兩大半兩再分之爲十六萬銖以漢錢法五
銖除之爲錢三萬二千漢黃金一斤直錢萬三斤直
錢三萬以二千爲工耗故云千鍰爲銅四百一十六
斤十兩大半兩與金三斤價相敵

食哉惟時

咨十有二牧曰食哉惟時柔遠能邇惇德允元而難
任人蠻夷率服史記五帝本紀作命十二牧論帝德
行厚德遠佞人則蠻夷率服頤煊案爾雅釋詁食僞
也僞古通作爲字爲哉猶言勉哉時是也惟是柔遠
能邇是論帝德行惇德允元而難任人是厚德遠佞
人與太史公所采古文合

朕虞

汝作朕虞正義鄭玄云言朕虞重鳥獸草木漢書王莽自稱爲予立予虞之官則莽謂此官名爲朕虞頤煊案史記五帝本紀於是以益爲朕虞是以朕虞爲官名後漢書明帝紀永平三年秋八月戊辰改大樂爲大予樂亦同此義

鮮食

益稷暨益奏庶鮮食又云暨稷播奏庶艱食鮮食頤煊案史記夏本紀一云令益予衆庶稻可種卑濕命后稷予衆庶難得之食食少調有餘以均諸侯一云與益予衆庶稻鮮食與稷予衆庶難得之食食少調有餘補不足徙居太史公以艱食爲稻食故兩引皆出稻字上文旣言稻食下文不必重言故以鮮食爲食少屬下句讀皆古文尙書說

赤埴墳

禹貢厥土赤埴墳釋文埴甫力反鄭作戠徐鄭王皆讀曰熾頤煊案太平御覽卷三十七引尙書曰徐州土戠墳謝沈注戠音志謝所注卽鄭本戠當與職字通用儀禮鄉射禮鄭注古文職爲戠今文或作埴說文埴黏上也義亦與職相近

江沱潛漢

浮於江沱潛漢釋文江沱潛漢四水名本或作潛於

漢非正義浮此四水乃得至洛本或潛下有于誤耳
頤煊案史記夏本紀作浮於江沱涔於漢爾雅釋水
漢爲潛亦當有于字

二百里蔡

二百里蔡傳蔡法也正義蔡之爲法無正訓也頤煊
案此與下文二百里流對言之皆謂流放之地左氏
昭元年傳周公殺管叔而蔡蔡叔杜預注蔡放也說
文作縶注縶縶散之也散亦是放義鄭注蔡之言殺
殺卽縶字

輔予一人

湯誓爾尙輔予一人史記殷本紀作爾尙及予一人
頤煊案爾雅釋詁及與也公羊隱元年傳及者何與
也左氏宣七年傳凡師出與謀曰及皆與輔義相近
其如台

盤庚上卜稽曰其如台傳則當卜稽於龜以徒曰其
如我所行頤煊案此台字不訓爲我其如台者猶言
其奈何也湯誓今汝其曰夏罪其如台史記殷本紀
作女其曰有罪其奈何高宗彤日乃曰其如台殷本
紀作乃曰其奈何西伯戡黎今王其如台殷本紀作
今王其奈何皆其證

罔有逸言

罔有逸言民用丕變傳無有逸豫之言民用大變從

化頤煊案罔有逸言謂無有失言說文逸失也廣雅釋詁逸失也逸通作佚下文惟予一人有佚罰傳佚失也

不浮

盤庚中鮮以不浮於天時傳浮行也少以不行於天時者言皆行天時頤煊案禮記聘義孚尹旁達鄭注孚讀爲浮此浮當讀爲孚孚信也言君無不承安民而恤之民亦安君之政相與憂少以不信於天時故無凶災

泰誓二篇

泰誓頤煊案今文泰誓二篇太史公采以入史記周

本紀九年武王上祭于畢至乃還師歸是上篇之辭居二年聞紂昏亂至孳孳無怠是中篇之辭武王乃作太誓告於衆庶至不可再不可三是下篇之辭然則泰誓上篇爲觀兵時事中篇爲伐紂以告諸侯下篇以告衆庶齊太公世家師尚父左杖黃鉞至與太公作太誓亦上篇文也左氏襄三十一年傳杜預注今尚書大誓亦無此文正義今尚書大誓謂漢魏諸儒馬融鄭玄王肅等所注者也是馬鄭王所注古文尚書本有泰誓二篇其書至唐猶存故泰誓正義云上篇觀兵時事中下二篇亦伐紂時事藝文類聚卷十六引泰誓作尚書曰卽是馬鄭王本至宋以後馬

鄭王尙書注亡此泰誓二篇亦從而亡矣

陰隲

洪範惟天陰隲下民傳隲定也天不言而默定下民
頤煊案呂氏春秋君守篇鴻範曰惟天陰隲下民陰
之者所以發之也高誘注陰陽升陟也言天覆生下
民助天舉發明之以仁義也爾雅釋詁隲陞也此正
高注所本陰隲又通作陰德史記田完世家行陰德
於民淮南人間訓夫有陰德者必有陽報新序雜事
篇吾聞有陰德者天報以福說文德升也其音義並
同

一五行

一五行蔡邕石經五行上無一二次第等字頤煊案
史記宋微子世家引亦無之周禮大宰鄭注引五福
一曰壽無九字漢書食貨志引八政一曰食無三字
谷永傳引皇極皇建其有極無五字說文卜部引卜
疑無七字後漢書李賢注文選李善注初學記藝文
類類太平御覽引皆無一二次第等字

戚我先王

金滕未可以戚我先王傳戚近也周公言未可以死
近我先王相順之辭正義死則神與先王相近故言
近先王頤煊案此說非也周公嫌穆卜禮畧故云未
可以近我先王因爲三壇同墀乃告大王王季文王

是慎重其禮也

自以爲功

公乃自以爲功頤煊案功通作攻字周禮大祝掌六祈以同鬼神示五日攻六日說鄭注攻說則以辭責之攻卽下文冊祝之辭下乃得周公所自以爲功代武王之說卽得此冊祝之辭史記魯周公世家作乃自以爲質質亦辭也

大誥譌字

大誥予不敢閉于天降威用寧王遺我大寶龜頤煊案漢書翟義傳作予豈敢自比於前人乎天降威明用寧帝室遺我居攝寶龜閉當作愆于當作乎寧王上屬用字讀又云日子復反鄙我周邦傳作是天反復右我漢國也鄙古通作否字否右字形相近東晉本改作鄙

歷人

梓材肆往姦宄殺人歷人宥傳又當詳察姦宄之人及殺人賊所過歷之人有所寬宥頤煊案爾雅釋言辟歷也大戴禮子張問入官篇歷者獄之所由生也歷人亦謂犯法之人

讎民

召誥予小臣敢以王之讎民百君子傳敢以王之匹民百君子治民者非一人言民在下自上匹之頤煊

案釋文讎字或作酬古通作疇字疇民謂同等之民
卽所謂齊民

旁作穆穆

洛誥旁作穆穆迓衡傳四方旁來爲敬敬之道以迎
太平之政頤煊案旁當作方儀禮士喪禮牢中旁寸
鄭注今文旁爲方堯典方鳩僝工說文引作旁述古
字旁方通用方作穆穆迓衡言公方爲穆穆之敬以
迎太平與益稷方施象刑惟明文義相類新序節士
篇引作旁施象刑維明傳皆訓爲四方非是

卑服

無逸文王卑服卽康功田功傳文王節儉卑其衣服
以就其安人之功以就田功頤煊案卑服謂文王卑
處西土在藩服之時

訓德

立政謀面用丕訓德傳謀所面見之事無疑則能用
大順德頤煊案訓德卽俊德堯典克明俊德史記五
帝本紀作能明馴德集解徐廣曰馴古訓字索隱史
記馴字徐廣皆讀曰訓訓順也

鄭不見周官篇

周官頤煊案鄭注古文尙書無此篇周禮小宰鄭注
前此者成王作周官其志有述天授位之義故周公
設官分職以法之掌次鄭注王之孤三人副三公論

道者鄭志趙商問成王周官立太師太傅太保茲惟三公是周官散文之見於他書者非此篇文

率循大卞

顧命率循大卞傳率羣臣循大法正義卞之為法無正訓頤煊案山井鼎攷文作帥修大辨帥古率字修循字相似說文采辨別也讀若辨又云采古文辨辨有法義是東晉本作率循大采正義本譌作卞

無蓋

呂刑鰥寡無蓋傳鰥寡得所無有掩蓋頤煊案無蓋猶言無害也爾雅釋言蓋裂也釋文舍人本作害蓋害古同聲通用字

商賚

頤煊
大經子攷文補遺攷
釋名卞
為和陽城考
為者北通降水也古姓攷
卷氏一書編
孔氏攷記二卷

震煊

大經子攷文補遺編
夏小正句句是也
孔子去魯後
為者北通降水也
古姓攷
卷氏一書編
王林大經攷
中庸攷
性性攷
物物攷
卷氏一書編
卷氏攷攷攷
卷氏攷攷攷
卷氏攷攷攷

道者鄭志趙商問成王周官立太師太傅太保茲惟三公是周官散文之見於他書者非此篇文

率循大卞

顧命率循大卞傳率羣臣循大法正義卞之爲法無正訓頤煊案山井鼎攷文作帥修大辨帥古率字修循字相似說文采辨別也讀若辨又云采古文辨辨有法義是東晉本作率循大采正義本譌作卞

無蓋

呂刑鰥寡無蓋傳鰥寡得所無有掩蓋頤煊案無蓋猶言無害也爾雅釋言蓋裂也釋文舍人本作害蓋害古同聲通用字

商賚

費誓我商賚爾傳我則商度汝功賜與汝頤煊案商當是賞字之譌甘誓用命賞于祖商說文作賚與賞字形相近東晉本改作商

力政

臨海洪頤煊

周書度訓解力爭則力政力政則無讓頤煊案政讀
爲征周禮均人掌均地政鄭注政讀爲征閭胥凡春
秋祭祀役政喪紀之數鄭注杜子春讀政爲征史記
天官書天子微諸侯力政集解徐廣曰一作征

衆非和不衆

衆非和不衆孔晁注和之以懷衆頤煊案不衆二字
文義不相承以上下文例之衆當作聚言衆非和則
不能聚也因字形相近而譌依注義亦當作聚字

終之以古

常訓解始之以古終之以古孔注言政必敬始慎終
頤煊案當作始之以古終之以今故下文云行古志
今政之至也政維今法維古皆今古對言之

樹惠不瘥

文酌解樹惠不瘥孔注瘥巔也以爲已巔也頤煊案
瘥當是瘥字之譌方言瘥審也郭璞注瘥埋又翳左
氏僖二年傳入自顛幹水經河水注引作巔幹穆天
子傳郭璞注引作寘幹說文寘塞也樹惠不瘥謂無
所翳塞

旁隧外權

大明武解旁隧外權頤煊案隧卽攻城穴土之法權
謂烽火史記封禪書通權火集解張晏曰權火烽火
也狀如井挈臯也其法類稱故謂之權

宗讒

程典解商王用宗讒震怒無疆孔注宗衆疆境也頤
煊案宗是崇字之譌史記殷本紀九侯女不熹淫紂
怒殺之而醢九侯鄂侯爭之疆并脯鄂侯西伯昌聞
之竊歎崇侯虎知之以告紂紂囚西伯羑里此卽指
其事所謂震怒無疆也孔注誤

枳

小開解德枳維大人大人枳維公公枳維卿卿枳維

大夫大夫枳維士頤煊案枳卽枝字爾雅釋地中有
枳首蛇焉釋文引孫炎云蛇有枝首枳枝古字通用
德枳維大人大人枳維公言大人爲德之枝公爲大
人之枝詩文王本枝百世蕩枝葉未有害本實先撥
正是此義後漢書馮衍傳李賢注引此數句云言上
下相維遞爲藩蔽也義亦作枝

移潔干清

寶典解移潔干清孔注實少而名多曰移也頤煊案
移卽侈字考工記鳧氏侈弇之所由興鄭注故書侈
作移儀禮少牢饋食禮主婦侈袂周禮追師鄭注引
作移袂移侈古字通用

三巫

克殷解乃命南宮百達史佚遷九鼎三巫孔注三巫
地名頤煊案三巫若是地名九鼎下當有于字史記
周本紀作命南宮括史佚展九鼎保玉保通作宝巫
與玉字形相近三巫疑卽宝玉之譌

合詳

文政解合詳毀成孔注合詳無德而信也頤煊案詳
審也事審則當斷之於心合衆審以爲審則反致疑
以敗成卽詩所謂如彼築室于道謀是用不潰于成
孔注非

赤宜未定

度邑解四方赤宜未定我于西土史記周本紀作日
夜勞來我西土集解徐廣曰一云官來頤煊案日夜
四方字形相近赤是亦字之譌勞來當依集解作官
來宜未卽官來之譌

居陽無固

自洛汭延于伊汭居陽無固史記周本紀作居易無
固頤煊案集解徐廣曰夏居河南初居陽城後居陽
翟字本作陽索隱言自洛汭及伊汭其地平易無險
固字譌作易尙書禹貢涇屬渭汭傳水北曰汭穀梁
僖二十八年傳水北爲陽居陽卽指二汭而言陽古
文作易與易相近因譌

驕用逐禽

皇門解譬若畋犬驕用逐禽其猶不克有獲孔注驕
謂不習也言是人之無得猶驕犬逐禽不能獲頤煊
案驕是畋犬之名詩駟鐵載獫狝驕毛傳獫狝驕田
犬也長喙曰獫短喙曰歇驕言用驕犬以逐禽其尙
不能有獲喻用賢臣尙不能利於家國況是讒賊媚
嫉之人

陰羽

王會解墀上張赤帟陰羽孔注陰鶴也以羽飾帳也
頤煊案陰讀爲翳山海經海外西經夏后啓左手操
翳郭璞注翳羽葆幢也爾雅釋言燾翳也翳羽謂以

羽爲竿首如羽葆幢之屬陰翳聲義皆相近

納

於越納頤煊案說文鱮魚似鼈無甲有尾無足口在腹下从魚納聲

蜀人以文翰

蜀人以文翰文翰者若臯雞頤煊案說文引逸周書作文翰若翬雉爾雅釋鳥雉類伊洛而南素質五彩皆備成章曰翬翬雉與文翰義合郭璞爾雅注引逸周書作文翰若彩雞其本已失今又作臯雞孔注臯雞似鳧冀州謂之澤特孔本似作澤雉後譌作臯雞臯澤古字通用見左傳釋文

質沙

史記解昔者質沙三卿朝而無禮君怒而久拘之譁而弗加諸卿謀變質沙以亡頤煊案質沙卽風沙風說文作夙穆天子傳玲瓏郭璞注音鈴瓏質古文作

反而復之

太子晉解若能幪予反而復之孔注幪覆也度謀還與否也頤煊案依注義反當是度字之譌上文言請歸聲就復與田故云謀還與否也度謀爾雅釋詁文

毛詩

毛詩正義毛字漢世加之六藝論云河間獻王好學

其博士毛公善說詩獻王號之曰毛詩是獻王始加
毛也頤煊案史記漢書引詩皆稱詩曰不稱毛詩說
文自序其傳詩毛氏注中引詩亦皆稱詩曰無毛字
唯漢書藝文志毛詩二十九卷毛詩故訓傳三十卷
此卽河間獻王所加之本

我姑酌彼金罍

卷耳我姑酌彼金罍毛傳姑且也釋文姑如字說文
作及音同云秦以市買多得爲及頤煊案依說文姑
當作沽與論語鄉黨沽酒同義史記律書姑洗左氏
定四年傳史記正義引白虎通皆作沽洗沽姑古字
通用

維鳩方之

鵲巢維鳩方之毛傳方有之也頤煊案方並也荀子
致士篇莫不明通方起楊倞注方起並起淮南汜論
訓乃爲窬木方版高誘注方並也爾雅釋水大夫方
舟李巡曰併兩船曰方舟併亦並也

蔽芾

甘棠蔽芾甘棠毛傳蔽芾小貌頤煊案爾雅釋言芾
小也傳以蔽芾爲小貌雖本於爾雅但與詩義不合
詩以芾釋蔽言其樹蔭之大故可以止於其下以聽
訟張遷碑蔽沛棠樹沛大也韓詩作蔽芾甘棠生民
第厥豐草第亦是大義小雅蔽芾其樛樛大木也鄭

箋樗之蔽芾始生殆亦狃於雅訓而失之

裯

小星抱衾與裯毛傳裯禪被也鄭箋裯牀帳也正義鄭既以衾爲被不宜復云禪被也漢世名帳爲裯蓋因於古故以爲牀帳頤煊案爾雅釋訓疇謂之帳郭璞注今江東亦謂帳爲疇裯疇同聲字故鄭據以易傳邢昺爾雅疏引鄭箋云疇牀帳也文選神女賦李善注引毛詩箋曰疇牀帳也後人據箋以改字如此類甚多

願言則嚏

終風願言則嚏毛傳嚏跲也鄭箋嚏讀當爲不敢嚏

咳之嚏頤煊案經文本作寔故毛訓爲跲鄭作嚏者改其義未改其字釋文寔本又作寔可證也今本作嚏是後人據鄭箋改之釋文劫也本又作跲崔云毛訓寔爲劫今俗人云欠欠劫劫是也不作劫字正義王肅云願以母道往加之則嚏劫不能行跲與劫音義同則作劫者王肅本也崔靈恩集注本作寔劫也釋文本從之寔寔劫劫皆因字形相近而譌

契闊

擊鼓死生契闊與子成說毛傳契闊勤苦也頤煊案契刻也讀如契臂爲盟之契闊遠也言以死生相約爲久遠之辭釋文韓詩云約束也亦是此義

北門

北門出自北門毛傳北門背明鄉陰鄭箋云喻已仕於闇君猶行而出北門頤煊案北門紂城北門詩譜自紂城而北謂之邶邶在紂城以北故仕邶者必出自北門

中葦

牆有茨中葦之言毛傳中葦內葦也頤煊案韓非子內儲說燕人李季好遠出其妻私有通於士季突至士在內中漢書淮南王傳王陽怒太子閉使與妃同內終不近妃霍光傳皆拜卧內卽卧室也易繫辭男女構精正義構合也言男女陰陽相感任其自然得一之性故合其精則萬物化生也草蟲亦旣觀止鄭箋旣觀謂已昏也引易曰男女觀精爲證並字異而義同

不屑髭也

君子偕老不屑髭也毛傳屑絜也頤煊案周禮挈壺氏鄭注挈讀如絜髮之絜絜與結同義鄭箋不絜者不用髮爲善言婦人髮美不用結他髮以爲髻一切經音義卷十三引字林髻絜髮也鄭箋善當卽髻字之譌正義言其髮美長不用髮而自絜美也失之

泮坡也

氓隰則有泮毛傳泮坡也釋文坡本或作陂澤陂詩

傳云障也本或作破字未詳觀王述意似作破頤煊
案當作泮破也匏有苦葉迨冰未泮毛傳泮散也破
散義相近淇則有岸以爲之防隰則有破散之時言
變易無常若是坡字與厓岸同義箋不必云泮讀爲
泮矣

大叔于田

大叔于田釋文叔于田本或作大叔于田者誤頤煊
案此詩三章凡十言叔不應此一句獨言大叔毛傳
叔之從公田也足證毛本無大字序欲以別於上篇
故加大字後人據序以增經非也

抑

抑磬控忌抑縱送忌正義抑者此叔能磬騁馬矣又
能控止馬矣抑者此叔能縱矢以射禽矣又能縱送
以逐禽矣頤煊案抑者美也猗嗟抑若揚兮毛傳抑
美色國語楚語於是乎作懿戒韋昭注懿讀曰抑爾
雅釋詁懿美也下章抑釋棚忌抑鬯弓忌義同

零露漙兮

野有蔓草零露漙兮釋文漙本亦作團頤煊案匡謬
正俗詩古本有水旁作專者亦有單作專者後人輒
改之爲團字讀爲團圓之團山井鼎考文本藝文類
聚卷八十一文選江淹雜體詩李善注引詩皆作團

維莠騫騫

甫田維莠驕驕頤煊案下章維莠桀桀毛傳桀桀猶驕驕也傳箋俱不釋驕驕之義揚子法言脩身篇田甫田者莠喬喬爾雅釋詁喬高也文選射雉賦何調翰之喬桀義卽本此

舞則選兮

猗嗟舞則選兮毛傳選齊鄭箋選者謂於倫等最上頤煊案選讀如選懦之選謂柔弱也舞取柔弱爾雅釋訓婆娑舞也郭璞注舞者之容賓之初筵屢舞僊僊屢舞傲傲屢舞嗒嗒皆取柔弱爲容

弗曳弗婁

山有樞子有衣裳弗曳弗婁毛傳婁亦曳也正義曳者衣裳在身行必曳之婁與曳連則同爲一事頤煊案公羊昭二十五年傳牛馬維婁何休注繫馬曰維繫牛曰婁則婁者繫也釋文婁馬云牽也玉篇手部引詩作弗曳弗樓孟子告子下踰東家牆而樓其處子趙歧注樓牽也

奉時辰牡

駟鐵奉時辰牡毛傳時是辰時也冬獻狼夏獻麋春秋獻鹿豕羣獸頤煊案辰當是麋字之省吉日其神孔有鄭箋神當作麋麋牝麋也中原之野甚有之爾雅釋獸麋牡麋牝麋此不言牝而言牡者是通言其類也吉日毛傳神大也與此下文辰牡孔碩義正相

合

夏屋渠渠

權輿於我乎夏屋渠渠鄭箋渠渠猶勤勤也頤煊案正義崔駰七依說宮室之美云夏屋渠渠荀子脩身篇有法而無志其義則渠渠然楊倞注渠讀為遽文選魯靈光殿賦揭遽遽而騰湊李善注遽遽高也遽遽卽渠渠也

可以樂飢

衡門泌之洋洋可以樂飢釋文樂本又作癯沈云舊本皆作樂字晚詩本有作疒下樂臧氏鏞堂曰鄭作癯飢不云樂當為癯是經本作癯也正義引王肅孫毓皆云可以樂道忘飢是傳中樂道忘飢之言非毛氏本文乃肅所私撰頤煊案經本作樂晚詩本作癯是後人據鄭箋改也隸釋繁陽令楊君碑徂徠樂志蔡邕焦君贊衡門之下栖遲偃息泌之洋洋樂以忘食義皆本於此詩臧說非是

歌以訊之

墓門歌以訊之釋文訊又作諗頤煊案說文訊問也从夂言聲諗讓也从言卒聲音義本別今經典常相亂者淳化帖東晉康帝書陸女郎問訊草書作諗與諗字形相似因譌

于絡

七月一之日于貉取彼狐狸爲公子裘毛傳于貉謂取狐狸皮也鄭箋于貉往搏貉以自爲裘也狐狸以共尊者頤煊案傳意不以于貉爲狐貉之貉與箋異義皇矣貉其德音釋文貉本又作貉貉古通作陌字言往陌取彼狐狸皮以爲公子裘也

予手拮据

鴟鵂予手拮据毛傳拮据擻搨也正義說文云擻持擻搨謂以手爪搨持草頤煊案今本說文無擻字搨字注戟持也据字注戟搨也戟聲近拮搨聲近据通之則可單言戟左氏哀二十五年傳褚師出公戟其手杜預注抵徙手屈肘如戟形斯干如矢斯棘鄭箋棘戟也如人挾弓矢戟其肘是也亦可單言据史記呂后本紀見物如蒼犬據高后掖據卽据也漢書五行志據作擻師古曰擻謂搨持之其義同也

駢駢征夫

皇皇者華駢駢征夫毛傳駢駢衆多之貌頤煊案楚辭招魂往來侁侁王逸注侁侁行聲也詩云侁侁征夫廣韻九臻注引詩亦作侁侁說文侁行貌

常棣核

常棣常棣之華毛傳常棣棣也釋文云本或作常棣核頤煊案王應麟詩考引韓詩序夫核燕兄弟閔管蔡之失道藝文類聚卷八十三引詩云夫核之華萼

不煒煒則作常棣核是

鄂不

鄂不鞞鞞毛傳鄂猶鄂鄂然言外發也鞞鞞光明也鄭箋不當作拊拊鄂足也正義王述之曰不鞞鞞言鞞鞞也頤煊案說文茅華盛从艸不聲卽此不字

烝也無戎

烝也無戎毛傳烝填也釋文烝之承反填依字音田與寘同又依古聲音塵塵久也故箋申之云古聲填塵同頤煊案爾雅釋詁烝衆也言良朋雖衆無相助已者

坎坎

伐木坎坎鼓我鄭箋爲我擊鼓坎坎然頤煊案說文引詩作鞞鞞鼓我段氏玉裁說文本鞞从夂从章夂聲孫恂夂下江切靈臺鼉鼓逢逢呂氏春秋季夏紀高誘注一切經音義卷六引詩皆作鼉鼓鼉鼉鼉卽鞞字之省邶風擊鼓其鏜毛傳鏜然擊鼓聲也正義司馬法曰擊鼓不過聞鏜聞皆與夂聲相近

樂只

南山有臺樂只君子鄭箋只之言是也頤煊案左氏襄十一年傳引詩曰樂旨君子殿天子之邦杜預注謂諸侯有樂美之德二十四年傳引詩云樂旨君子邦家之基杜注言君子樂美其道說文旨美也

遐不

遐不眉壽鄭箋遐遠也遠不眉壽者言其近眉壽也
頤煊案械樸遐不作人毛傳遐遠也遠不作人也遐
不猶言不遐下武不遐有佐思齊烈假不遐遐又通
作瑕泉水不瑕有害狼跋德音不瑕其音義並同

助我舉柴

車攻助我舉柴毛傳柴積也鄭箋舉積禽也頤煊案
說文云擘積也从手此聲詩曰助我舉擘文選西京
賦收禽舉齧薛綜注齧死禽獸將腐之名也李善注
齧聚肉名不論腐敗也聚肉卽積也漢書婁敬傳師
古曰齧讀曰瘠易說卦乾爲瘠馬釋文京荀作柴柴

齧字義通也

夜未艾

庭燎夜未艾毛傳艾久也鄭箋艾未曰艾以言夜先
雞鳴時頤煊案左氏昭元年傳國未艾也杜預注艾
絕也絕亦盡也夜未艾謂夜漏未盡時

維周之氏

節南山維周之氏鄭箋氏當作桎鐻之桎釋文桎之
實反又丁履反礙也本有作手旁至者誤也阮尙書
校勘記段玉裁云當是抵字誤桎是也別體字抵作
扞與桎字形近頤煊案桎當是座字之譌說文座礙
止也从广至聲座底字形相近與釋文義合卽今俗

室礙字

填寡

小宛哀我填寡毛傳填盡釋文韓詩作疹頤煊案填是瘡之借字雲漢胡寧瘡我以旱鄭箋瘡病也釋文韓詩作疹疹通作殄周禮稻人夏以水殄草鄭注殄病也

蛇蛇碩言

巧言蛇蛇碩言出自口矣毛傳蛇蛇淺意也正義蛇蛇然淺意之大言頤煊案蛇蛇美也爾雅釋訓委委佗佗美也太平御覽卷六百九十引詩作委委蛇蛇古字通用蛇蛇大言猶莊子齊物論大言炎炎簡文

注炎炎美盛貌蓋反譏之之辭

既往既來

大東既往既來使我心疚鄭箋言譚人自虛竭餽送而往周人則空盡受之曾無反幣復禮之惠是使我心傷病也頤煊案既來當作既求謂我以禮往求糴於彼而彼不我恤是使我心疚也求疚韻合來求字形相近

廢大也

四月廢爲殘賊毛傳廢伏也釋文又一本作廢大也此是王肅義正義定本廢訓爲大頤煊案當從定本作廢大也毛傳本於爾雅爾雅釋詁廢大也列子揚

朱篇廢虐之主張湛注廢大也列女傳引詩廢爲殘
賊言怵於惡是三家詩義鄭箋言大於惡宋本可證
俗本改作怵於惡非是

伊寡婦之利

大田伊寡婦之利鄭箋聽矜寡取之以爲利頤煊案
寡婦猶言小民兄曰寡兄妻曰寡妻國君曰寡人皆
寡小之辭不言民言婦者承上文以其婦子饑彼南
畝而言言婦而子在其中

室人入又

賓之初筵室人入又鄭箋又復也賓手挹酒室人復
酌爲加爵頤煊案此與下文矧敢多又又卽侑字勸

也儀禮有司徹乃議侑於賓鄭注古文侑皆作宥禮
記王制王三又鄭注又當作宥又侑宥古字通用

維師尙父

大明維師尙父毛傳師大師也尙父可尙可父史記
齊太公世家集解駟案劉向別錄曰師之尙之父之
故曰師尙父父亦男子之美號也頤煊案齊世家太
公望呂尙譙周曰姓姜名牙尙當是太公之字宣和
博古圖周淮父卣銘穆從師淮父又云對揚師淮父
休淮亦是字

廼宣廼畝

綿廼宣廼畝鄭箋時耕曰宣頤煊案此節是初定其

疆界尙未及耕宣謂宣通其溝防重水利也畝謂定其一夫受田之制

不長夏以革

皇矣不長夏以革毛傳革更也不以長大有所更鄭箋夏諸夏也不長諸夏以變更王法頤煊案禮記鄉飲酒義夏之言假也釋名釋天篇夏假也寬假萬物使生長也尙書大傳夏者假也革亟也不長夏以革謂非明德之君不長假以天命而亟更之

徒歌曰罅

行葦或歌或罅釋文毛云徒歌曰罅爾雅云徒擊鼓謂之罅徒歌謂之謠頤煊案毛公釋詩亦不盡依爾

雅徒歌曰罅毛或別有所受今本傳作徒擊鼓曰罅是正義從王肅本改

何以舟之

公劉何以舟之維玉及瑤鞞琫容刀毛傳舟帶也鄭箋民亦愛公劉之如是故進玉瑤容刀之佩頤煊案周禮司尊彝皆有舟鄭注鄭司農云舟尊下臺若今時承槃何以舟之謂何以奉槃進之故鄭箋卽訓舟爲進也

包魚休

蕩女包魚休于中國毛傳包魚休猶彭亨也鄭箋包魚休自矜氣健之貌頤煊案易大有釋文引于注彭亨驕滿

貌文選魏都賦咆休雲撤劉淵林注咆休猶咆哮也
自矜健之貌詩云咆休於中國魚作咆與毛詩異

倉兄填兮

桑柔倉兄填兮毛傳倉喪也兄滋也填久也鄭箋喪
亡之道滋久長正義倉之爲喪其義未聞頤煊案釋
文兄本亦作況倉兄猶言倉皇也尙書無逸則皇自
敬德正義王肅本皇作況無皇曰漢石經皇作兄古
字本通用填當作瘕病也言匆遽而至於病所以不
絕心憂也

來旬

江漢來旬來宣鄭箋旬當作營正義旬之與營字相

類頤煊案正月憂心惛惛釋文惛本又作熒周禮均
人鄭注旬讀如營營原隰之營是皆其字相類之證
彼徂矣

天作彼徂矣岐有夷之行後漢書西南夷傳引韓詩
作彼徂者歧有夷之行頤煊案鄭箋後之往者又以
歧邦之君有佼易之道正義徂謂新往者正義釋彼
作矣爲作矣彼徂矣爲往者箋疏本皆當作者字

不吳

絲衣不吳不敖釋文吳舊如字說文作吳吳大言也
何承天云吳字誤當作吳从口下大故魚之大口者
名吳胡化反頤煊案史記封禪書引此詩作吳孝武

本紀引此詩作虞虞吳古字通用說文吳一曰大言也从矢口在矢部大部無吳字一切經音義卷十一誤此古文奇字鐸吳字不必作吳而有華音故毛傳卽以譁訓之

龍和也

酌我龍受之毛傳龍和也鄭箋龍寵也正義龍之爲和其訓未聞寵字以龍爲聲故龍爲寵也頤煊案說文龔从共龍聲龔古通作恭字恭有和義故毛傳以龍爲和也

駟駟牡馬

駟駟牡馬釋文牡本或作牧頤煊案正義本作牧馬

顏氏家訓書證篇詩云駟駟牡馬江南書皆作牝牡之牡河北本悉爲放牧之牧藝文類聚卷九十三太平御覽卷九百五十八文選李陵荅蘇武書李善注引作牧皆河北本

白馬黑鬣曰駱

有驪有駱毛傳白馬黑鬣曰駱釋文韓詩及字林云白馬黑髦也正義定本集注髦字皆作鬣頤煊案淮南時則訓乘白駱高誘注白馬黑毛曰駱毛卽髦字釋文引樊孫爾雅並作白馬黑髦鬣尾也亦當作髦字

歲其有

有駟自今以始歲其有君子有穀詒孫子釋文歲其有本或作歲其有矣又作歲其有年者矣皆衍字也阮尙書校勘記正義本未有明文頤煊案毛傳歲其有豐年也此以豐年釋年字正義春秋書有年者謂五穀大熟豐有之年故知其有年謂從今以去當有豐年也定本集注皆云歲其有年正義本有年字

居常與許

闕宮居常與許毛傳常許魯南鄙西鄙頤煊案管子小匡篇桓公曰吾欲南伐何主管子對曰以魯爲主反其侵地常潛國語魯語作棠潛左氏隱五年公觀魚於棠棠卽常也常在魯南故毛傳訓爲南鄙

景負維河

玄鳥景負維河鄭箋河之言何也頤煊案隸釋逢盛碑無可奈河吳仲山碑疆尔感痛奈河隋龍藏寺碑以何人爲河人河何古字本通用

臨海洪頤煊

說文引周禮

說文禘字注周禮曰五歲一禘禘字注周禮曰三歲一禘頤煊案今周禮無此文後漢書張純傳引禮三年一禘五年一禘無周字

腊人

天官序官腊人鄭注腊之言夕也疏乾曰腊朝曝於夕乃乾故云腊之言夕或作久字久乃乾成義亦通也頤煊案夕當作久說文昔乾肉也从殘肉日以晞之與俎同意籀文作腊詩墓門誰昔然矣毛傳昔久

也禮記郊特牲鄭注爲其味厚腊毒也釋文隱義云腊久也

禮賓

大宰之職以八統詔王馭萬民八日禮賓鄭注禮賓賓客諸侯所以示民親仁善鄰頤煊案賓客諸侯非所以馭萬民鄉大夫之職三年則大比攷其德行道藝而與賢者能者鄉老及鄉大夫帥其吏與其衆寡以禮禮賓之卽此所謂禮賓也

臣妾

以九職任萬民八日臣妾聚斂疏材鄭注臣妾男女貧賤之稱晉惠公卜懷公之生日將生一男一女男爲人臣女爲人妾頤煊案說文僕給事者古文作僕臣卽僕字之省尙書費誓臣妾逋逃孝經不敢失於臣妾漢書刑法志隸臣妾一歲免爲庶人凡臣妾對言者古皆通作僕字

羊泠毛而毳

內饗羊泠毛而毳羶鄭注泠毛毛長總結也疏泠毛謂毛長也而毳謂毛別聚結者頤煊案泠與零同泠毛謂毛零落而又毳結禮記內則正義泠謂毛本稀泠毳謂毛頭毳結斯得之矣

膾胖之事

腊人掌乾肉凡田獸之脯腊膾胖之事阮尙書校勘

記臙胖之事四字疑衍文下經薦脯臙胖臙字胖字始有注若於此先言臙胖二鄭杜氏康成當於此下注矣頤煊案凡田獸之脯腊臙胖之事十字當作一句讀下乃言其用臙胖內饗已注此復重言亦不能以先後定之疏標起止腊人至之事又引趙商問於此節之末賈疏本當有此四字

涿菹

醢人涿菹鴈醢鄭注鄭司農云涿水中魚衣玄謂涿箭萌頤煊案詩采菽正義引此作涿菹說文涿水衣从艸治聲箚竹萌也从竹怠聲二字不同爾雅釋艸箚箭萌郭璞注周禮曰箚菹雁醢是司農本作涿鄭本作箚今并譌作涿字不可通矣

苦鹽

鹽人祭祀共其苦鹽鄭注杜子春讀苦爲監謂出鹽直用不凍治疏苦當爲監監謂出於鹽池今之類鹽是也頤煊案爾雅釋言滷苦也淮南墜形訓練苦生鹹則杜說是

羽物

司裘王乃行羽物鄭注鄭司農云行羽物以羽物飛鳥賜羣吏玄謂此羽物小鳥鶉雀之屬鷹所擊者中秋鳩化爲鷹中春鷹化爲鳩順其始殺與其將止而大班羽物頤煊案如注所言非司裘所掌羽人掌以

時徵羽翮之政於山澤之農以當邦賦之政令此羽物亦言王后車飾及旌旗之屬與射侯爲一例皆司裘掌之與羅氏行羽物別

廡裘

大喪廡裘鄭注故書廡爲淫鄭司農云淫裘陳裘也玄謂廡興也疏此周禮一部之內稱廡者衆多故書皆爲淫先鄭皆爲陳後鄭皆破從興頤煊案說文廡陳輿服於庭也與先鄭同

潛服

闇人潛服賊器不入宮鄭注潛服若衷甲者頤煊案潛服深衣之屬禮記玉藻非列采不入公門振絺綌不入公門表裘不入公門襲裘不入公門卽其禁

貔獠

地官大司徒之職其動物宜羸物鄭注羸物虎豹貔獠之屬疏爾雅及諸經不見有獠曲禮云載貔貅此鄭云貔獠獠卽貅也頤煊案史記周本紀如豺如離集解徐廣曰此訓與螭同說文作离注云歐陽喬說离猛獸也文選西都賦李善注引歐陽尚書說螭猛獸也卽獠字疏以貅當之非是

步廣

保氏六日九數鄭注鄭司農云九數方田粟米差分少廣商功均輸方程羸不足旁要頤煊案少廣當作

步廣史記衛青列傳後子夫男步廣集解徐廣曰步
一作少後漢書鄭玄傳李賢注引九章算術作步廣
字尙不誤

奔者不禁

媒氏中春之月令會男女於是時也奔者不禁鄭注
重天時權許之也疏此月既是娶女之月若有父母
不娶不嫁之者自相奔就亦不禁之頤煊案禮記內
則聘則爲妻奔則爲妾鄭注奔或爲衒說文衒行且
賣也重文作衒奔者不禁亦謂賣者不禁疏義失之
債

司市以量度成買而徵債鄭注債買也疏此字所訓
不定案下文所云貴債者鄭注貴賣之頤煊案說文
賣衒也卽此債字玉篇賣或作粥禮記曲禮不粥祭
器鄭注粥賣也淮南說山訓郢人有粥其母高誘注
粥買也皆兼二字訓之

辟布

凡萬民之期於市者辟布者量度者刑戮者各於其
地之敘鄭注故書辟爲辭鄭司農云辭布辭訟泉物
者也玄謂辟布市之羣吏考實諸泉人及有遺忘頤
煊案辟布謂司空所頒市物之法度鄉師之職旣役
則受州里之要以攷司空之辟鄭注辟功作章程是
也宰夫之職凡失財用物辟名者以官刑詔冢宰而

誅之鄭注辟名詐爲書以空作見文書與實不相應也皆與此辟布同義

膳府

廛人凡珍異之有滯者斂而入於膳府鄭注爲買之入膳夫之府所以紓民事而官不失實頤煊案膳夫不得稱膳府膳府當是泉府之譌泉府掌以市之征布斂市之不售貨之滯於民用者以其賈買之物揭而書之以待不時而買者買者各從其抵都鄙從其主國人郊人從其有司然後予之司市以泉府同貨而斂賒卽其職也

飾行

胥師察其詐僞飾行儷慝者而誅罰之鄭注鄭司農云儷賣也慝惡也謂行且賣姦僞惡物者玄謂飾行儷慝謂使人行賣惡物於市巧飾之令欺誑買者頤煊案經文行當是街字之譌先鄭以街爲行且賣與說文義同後鄭以街爲炫耀故云巧飾之令欺誑買者疏謂先鄭行爲行步之行不爲行濫之行故後鄭不從非是

屬遊

司虢以屬遊飲食於市者鄭注鄭司農云以屬遊飲食羣飲食者頤煊案管子立政篇圉屬羣徒不順於常者閭有司見之復無時屬遊與圉屬義同

十搏爲縛

羽人凡受羽十羽爲審百羽爲搏十搏爲縛鄭注爾雅曰一羽謂之箴十羽謂之縛百羽謂之緝其名音相近頤煊案穆天子傳郭璞注十羽爲箴百羽爲縛十縛爲緝見周官廣韻注引周禮百羽爲搏十搏爲緝是箴審同聲字搏當作縛縛當作緝釋文縛劉音古本反劉昌宗本字作緝

文昌司命

春官大宗伯之職以禋燎祀司中司命鄭注鄭司農云司中三台三階也司命文昌宮星玄謂司中司命文昌第五第四星頤煊案禮記祭法王爲羣姓立七

祀一日司命鄭注此非大神所祈報大事者也小神居人之間司察小過作譴告者爾司命主督察三命今時民家或春秋祠司命風俗通祀典篇司命文昌也今民間祀司命刻木長尺二寸爲人像皆祠以腊率以春秋之月此卽今世所祀文昌像文昌星名後刻木祀之本在七祀之列故祀典至今不廢

圍敗

以禴禮哀圍敗鄭注同盟者合會財貨以更其所喪春秋襄三十年冬會於澶淵宋裁故是其類疏此經本不定若馬融以爲國敗正本多作圍敗頤煊案小行人若國師役則令槁禴之字當作國敗鄭注不釋

圍字亦當作國敗

貞

天府季冬陳玉以貞來歲之媿惡鄭注問事之正曰貞頤煊案大卜凡國大貞鄭注貞之爲問問於正者必先正之乃從問焉說文貞卜問也左氏哀十七年傳衛侯貞卜謂問於卜貞卽是問故鄭司農注皆云貞問也不訓爲正鄭注失之

先王之葬居中

冢人先王之葬居中以昭穆爲左右鄭注先王造塋者疏云先王造塋者但王者之都有遷徙之法若文王居豐武王居鎬平王居於洛邑所都而葬卽是造塋者也頤煊案先當是凡字之譌與下文凡諸侯對言之

順豐年

大祝掌六祝之辭一曰順祝鄭注順祝順豐年也頤煊案蔡邕獨斷大祝掌六祝之辭順祝願豐年也小祝順豐年鄭注順豐年而順爲之祝辭當作願豐年而順爲之祝辭經注三願字皆作順涉經文順祝而譌

一曰祠

作六辭以通上下親疏遠近一曰祠鄭注鄭司農云祠當爲辭謂辭令也頤煊案旣云作六辭則六者皆

是辭不必復言辭令大宗伯以祠春享先王爾雅釋
天春祭曰祠公羊莊八年甲午祠兵五經異義公羊
說祠者祠五兵矛戟劍楯弓鼓及祠蚩尤之造兵者
祠是祭祀之名

凡數從政者

御史凡數從政者鄭注自公卿以下至胥徒凡數及
其見在空缺者鄭司農讀言掌贊書數書數者經禮
三百曲禮三千法度皆在玄以爲不辭故改之釋文
凡數作數凡頤煊案司農數字屬上句讀作掌贊書
數凡字不得在數上鄭改其讀未改其字數凡謂計
其總從政者若作凡數則義不可通矣今本由後人

誤乙

環人

夏官環人掌致師鄭注致師者致其必戰之志頤煊
案序官鄭注環猶卻也以勇力卻敵環通作環左氏
成二年傳環甲執兵杜注環貫也下文環四方之故
亦謂其威武禦敵與秋官環人義別

聚橐

挈壺氏凡軍事縣壺以序聚橐鄭注鄭司農云以序
聚橐以次更聚擊橐備守也頤煊案說文擷夜戒守
有所擊从手取聲春秋傳日賓將擷罽師掌固杜子
春注皆作賓將趨左氏襄二十五年傳陪臣干擷釋

文服本作誨史記齊太公世家作陪臣爭趣聚誨趣趨皆卽擻之假借字

薄借綦

弁師玉璣鄭注璣讀如薄借綦之綦疏薄借之語未聞頤煊案禮記內則鄭注綦屨繫也說文綦重文縹一日不借縹釋名釋衣服齊人謂艸屨曰扉或曰不借不借卽薄借也

授旅賁及

司戈盾祭祀授旅賁及故士戈盾鄭注及如杖長尋有四尺頤煊案旅賁氏掌執戈盾夾王車而趨凡祭祀會同賓客則服而趨並未言及下文軍旅會同授旅賁及虎士戈盾此及當是及字之譌

官中

秋官士師之職掌官中之政令鄭注大司寇之官府中也王氏引之經義述聞徧考五官無謂官府爲官中者官當爲宮字之譌也頤煊案官中卽下文所謂獄訟之辭小司寇以三刺斷庶民獄訟之中鄭注中謂罪正所定鄉士遂士縣士方士皆云獄訟成士師受中鄭注受中謂受獄訟之成也卽此所謂官中也小司寇歲終則令羣士計獄弊訟以登中於天府天府凡官府鄉州及都鄙之治中受而藏之以詔王察羣吏之治皆是

槍雷椎棹

職金凡國有大故而用金石則掌其令鄭注用金石者作槍雷椎棹之屬頤煊案雷作礪椎作礪槍作鎗棹作鎗皆金石所用禮記曲禮進戈矛者前其鎡釋文本又作鎡說文鎡矛戟秘下銅鎡也段氏玉裁漢讀考棹作棹云說文作杙槿也从木丁聲通俗文撞出曰杙非金石所施

以攻說禴之

庶氏掌除毒蠱以攻說禴之鄭注攻說祈名祈其神求去之也鄭司農云禴除也玄謂此禴讀如潰癰之潰頤煊案以攻說禴之猶言或攻之或說之或禴之

二三著皆祈名大祝掌六祈以同鬼神示三日禴五日攻六日說詛祝掌盟詛類造攻說禴崇之祝號鄭謂此與以禴禮哀圍敗禴字義別故云此禴讀如潰癰之潰

使則介之

行夫居於其國則掌行人之勞辱事焉使則介之鄭注使謂大小行人也故書曰夷使鄭司農云夷使使於四夷則行夫主爲之介玄謂夷發聲頤煊案今本使上脫夷字故書曰夷使五字是後人增加非鄭注本文釋文焉劉音夷劉昌宗本已脫夷字因以焉當夷非是見王氏經義述聞

姁胡之筇

考工記姁胡之筇鄭注姁胡胡子之國在楚旁杜子春云姁讀爲焚咸上之焚書或爲邠頤煊案籥章掌土鼓豳籥鄭注鄭司農云豳籥豳國之地竹豳通作邠邠地產竹可以爲籥亦可以爲筇義亦得通

不歆

輪人則轂雖敝不歆鄭注鄭司農云歆當作耗玄謂歆歆暴陰柔後必撓減幃革暴起頤煊案先鄭謂歆當作耗爾雅釋詁毗劉暴樂也詩桑柔捋采其劉毛傳劉爆爍而希也此卽耗字之義後鄭謂歆爲歆暴者歆暴當作槁暴晏子春秋雜上篇今夫車輪山之直木也良匠揉之其圓中規雖有槁暴不復羸矣荀子勸學篇雖有槁暴不復挺者輒使之然也卽其義矣

萬之以眡其匡也

是故規之以眡其圓也萬之以眡其匡也鄭注等爲萬萑以運輪上輪中萬萑則不匡刺也故書萬作禹鄭司農云讀爲萬書或作矩頤煊案此篇終統論輪制萬與規對萬卽矩字匡與圓對匡讀爲方輿人圓者中規方者中矩亦同此義

利準

輈人輈注則利準利準則久和則安鄭注故書準作

水鄭司農云注則利水謂轅脊雨注令水去利也玄謂利水重讀似非也注則利謂轉之柔者形如注星則利也準則久謂轉之在輿下者平如準則能久也惠氏士奇云依法利準二字衍按注云利水重讀似非也則司農於經文兩遍讀之耳必不增經可知注中鄭司農云下當有利水重讀四字故後鄭辨之云利水重讀似非頤煊案鄭注玄謂利水重讀似非也經文明重利準二字利水重讀四字是釋經文非駁司農注惠氏說誤

杼首

玉人之事大圭長三尺杼上終葵首鄭注終葵椎也為椎於其杼上明無所屈也杼網也頤煊案文選魏都賦卷無杼首劉淵林注方言燕記曰豐人杼首杼首長首也

疾疾險中

弓人疾疾險中鄭注牛有久病則角裏傷疏險傷也頤煊案險當作儉古字通用儉謂瘦省也

淹中禮古經

漢書藝文志禮古經五十六卷禮古經者出於魯淹中及孔氏學頤煊案蘇林曰淹中里名皇覽曰奄里伯公冢在魯城內祥舍中孔氏學者孔子壁中書也淹中所得禮古經不與孔壁同時故志分別言之後

漢書儒林傳孔安國所獻禮古經五十六篇鄭君六藝論後得孔子壁中河間獻王古文禮五十六篇記百三十一篇皆不言淹中所得或曰河間獻王古文禮卽淹中本

禮經十七篇

藝文志禮古經五十六卷經七十篇又云七十篇文相似多三十九篇頤煊案稱古經者淹中及孔壁所得其稱經者卽高堂生所傳士禮十七篇古經十七篇與高堂生禮同益以所多三十九篇爲五十六篇六藝論本於藝文志亦云其十七篇與高堂生同而字多異今本漢書作七十篇是傳寫者誤乙

質明

士冠禮宰告曰質明行事鄭注質正也宰告曰旦日正明行冠事頤煊案士昏禮質明贊見婦於舅姑鄭注質平也史記歷書雞三號卒明集解徐廣曰卒一作平正義自平明寅至雞鳴丑凡十二辰平明卽平旦也

袷玄

兄弟畢袷玄鄭注袷同也古文袷爲均頤煊案說文袷玄服从衣彡聲此卽今文義也鄭注袷同也字雖從今文作袷注仍依古文均字訓之後人不知均袷爲同聲假借字別作衽字淮南齊俗訓尸祝衽袷衽

衽卽衿玄二字之俗說文皆不載

攝酒

再醮攝酒其他皆如初鄭注攝猶整也整酒謂撓之
疏案有司徹云司宮攝酒注云更洗益整頓之不可
云洗亦當爲撓謂更撓攪添益整頓示新也頤煊案
撓當作洗再醮如初儀始醮云卒洗升酌再醮酒因
於前其亦當洗酌以示敬故鄭云整酒謂洗之有司
徹亦唯徹室中之饋因前正祭之酒故鄭注更洗益
整頓之其義正同

緇袍

士昏禮主人爵弁纁裳緇袍鄭注袍謂緣袍之言施
以緇緣裳象陽氣下施頤煊案廣雅釋器袍袖也史
記司馬相如列傳揚袍卹削集解徐廣曰袍衣衷也
袍通作袍說文袍裾也淮南齊俗訓裾衣博帶高誘
注裾衷也

纁衽

女次純衣纁衽鄭注衽亦緣也衽之言任也以纁緣
其衣象陰氣上任也凡婦人不常施衽之衣盛昏禮
爲此服喪大記曰復衣不以衽明非常頤煊案方言
蔽邾齊魯之郊謂之衽禮記雜記上纁衽釋文王肅
云婦人蔽膝也周禮內司服王后禕衣說文禕蔽邾
也故衽亦爲婦人之上服

走見

士相見禮請吾子之就家也某將走見鄭注走猶往也又某也固辭不得命將走見鄭注走猶出也疏走猶出也者亦猶上之走往彼據向賓家故走爲往此據出門故云走出也頤煊案走見文同不應其注互異趨走同義說文走趨也走見猶趨見也

下

始見於君執摯至下容彌蹙鄭注下謂君所也疏不言所而言下者凡臣視祫已下故不言所言下也頤煊案下謂堂下禮記禮運澄酒在下禮器樂交應乎下論語子罕拜下凡言下者皆謂堂下

衆皆若是

凡與大人言始視面中視抱卒視面毋改衆皆若是鄭注衆謂諸卿大夫同在此者皆若是其視之儀無異也今文衆爲終頤煊案衆終古字通用此義當從今文作終始視中視卒視是舉其言之節終則舉其燕見始末而言

疑立

鄉飲酒禮賓西階上疑立鄭注疑讀爲疑然從於趨盾之疑疑正立自定之貌頤煊案疑讀爲擬謂其面度向主人也士相見禮凡燕見於君必辯君之南面若不得則正方不疑君不疑君謂不向君也

盥洗

執觶興盥洗北面鄭注洗觶奠之示絜敬疏執觶興洗北面者案鄉射大射禮皆直云取觶洗南面反奠於其所不云盥此俗本有盥者誤頤煊案禮記鄉飲酒義盥洗揚觶所以致絜也孔疏盥洗揚觶者謂主人將獻賓以水盥手而洗爵揚觶謂既獻之後舉觶酬賓之時亦盥洗也孔氏本有盥字

尊者

尊者降席席東南面鄭注尊者謂此鄉之人仕至大夫者也今來助主人樂賓主人所榮而遵法者也因以爲名頤煊案尊者卽尊者穀梁成五年傳伯尊由忠問焉太平御覽卷六百四十九引作伯遵後漢書光武帝紀擊更始鄗王尹遵李賢注遵或作尊古字通用

二指之間

鄉射禮凡挾矢於二指之間橫之鄭注二指謂左右手之第二指此以食指將指挾之疏以左擘指拓弓右擘指鈎弦故知挾矢以第二第三指間第二指爲食指左傳云子公之食指動是也第三指爲將指左傳云吳王闔閭傷於將指是也頤煊案特牲饋食禮挂於季指鄭注季小也孟子告子上今有無名之指趙歧注無名之指手之第四指也凡手第一指曰擘

指第二指曰食指第三指曰將指第四指曰無名指
第五指曰季指也

苟敬

燕禮記賓爲苟敬鄭注苟且也假也聘禮記燕則上
介爲賓賓爲苟敬鄭注苟敬者主人所以小敬也頤
煊案且敬小敬皆不足以言禮說文苟自急救也孫
恂音力已切此經兩苟字讀當如之自急救以爲敬
殺其禮非殺其敬也

豐字

大射儀膳尊兩甌在南有豐鄭注豐以承尊也說者
以爲若井鹿盧其爲字從豆曲聲疏其爲字從豆曲

聲者此謂上聲下形之字年和穀豆多有故從豆爲
形也豐者承尊之器象形也是以豐年之字曲下著
豆今諸經皆以承尊爵之豐不用本字之曲而用豐
年之豐故鄭還依豐字解之頤煊案說文豐行禮之
器也从豆象形讀與禮同豐豆之豐滿者也从豆象
形一曰鄉飲酒有豐侯者賈疏正據說文爲義當云
豐者承尊之器象形也是以豐年之字豐下著豆今
諸經皆以承尊爵之豐不用本字之曲而用豐年之
豐今疏中豐字皆作豐者傳寫譌也說文無曲字豐
从豆象形不從曲得聲與鄭異義

竹簋方

聘禮勞以二竹簋方鄭注竹簋方者器名也以竹爲之狀如簋而方如今寒具筥筥者圓此方耳釋文作簋云本或作簋外圓內方曰簋內圓外方曰簋頤煊案說文簋黍稷方器也簋黍稷圓器也注云狀如簋而方經當作簋字詩伐木陳饋八簋毛傳圓曰簋周禮舍人凡祭祀共簋簋鄭注方曰簋圓曰簋故此疏云凡簋皆用木而圓此則用竹而方故曰如簋而方考工記玉人疏簋法圓今此竹簋方爲之者此或棗栗與黍稷異也明經文作簋字

殮飪

宰夫朝服設殮飪一牢頤煊案公羊成一二年傳何休注引聘禮作宰夫朝服致殮臚聘禮記唯羹飪鄭注古文飪作臚此引作致殮臚者亦古文注不言者畧也

匹馬卓上

覲禮匹馬卓上九馬隨之鄭注卓讀如卓王孫之卓卓猶的也以素的一馬以爲上書其國名後當識其何產也頤煊案釋名釋首飾以丹注面曰的的灼也此本天子諸侯羣妾當以次進御其有月事者止而不御重以口說故注此丹於面灼然爲識書馬之法亦猶是也故鄭注訓卓爲的

竹籩蓋

既夕燕器杖笠斐鄭注笠竹篋蓋也疏篋竹之青皮
王氏引之經義述聞說文玉篇廣韻俱無篋字篋蓋
考字之譌郭璞爾雅注考音敷考之言皮膚也故賈
疏以爲竹青皮錢氏曉徵荅問謂篋當作筠案筠與
篋字不相似若本是筠字無緣誤爲篋也頤煊案爾
雅釋草華考也考榮也說文以考爲華字或體不可
謂竹青皮說文笱析竹篋也篋竹膚也爾雅漆委葉
釋文本作茶此笱字或作漆因譌而爲篋其形聲皆
相近

見

藏器於旁加見鄭注見棺飾也更謂之見者加此則

棺柩不復見矣疏見棺飾也者飾則帷荒以其與棺
爲飾是以喪大記云飾棺君龍帷黼荒大夫畫荒士
布帷布荒注云飾棺者以華道路及壙中不欲衆惡
其心也此柩入壙還以帷荒加於柩故鄭注云及壙
中也頤煊案見當卽荒字之譌字形相近

長占

特牲饋食禮筮者還東面長占鄭注長占以其屬之
長幼旅占之頤煊案士冠禮筮人還東面旅占士喪
禮命筮者受視反之東面旅占經無言長占者旅古
文作表長古文作尢字形相近長占卽旅占之譌

養有以也

祝日養有以也鄭注以謂如何其久也必有以也之以釋文以依注音似或如字頤煊案疏已上皆爲以爲似者誤也疏意以讀爲似改其音未改其字已上皆爲以謂注中自此已上凡五以字皆當爲以或改作似字者誤也

被錫衣

少牢饋食禮主婦被錫衣移袂鄭注被錫讀爲髮髻古者或剔賤者刑者之髮以被婦人之紒爲飾因名髮髻焉此周禮所謂次也頤煊案詩采芣被之僮僮被之祁祁毛傳被首飾也皆單言之髮髻卽被大射儀羣用錫鄭注錫布也周禮司服王爲三公六卿錫衰鄭司農云錫麻之滑易者列子周穆王篇衣阿錫史記司馬相如列傳被阿錫錫衣衣之細滑者卽是不專麻布與特牲饋食主婦纓笄宵衣爲一例鄭注以髮釋被以髻釋錫謂大夫妻尊亦衣綃衣而侈其袂者失之

讀書叢錄卷四

禮記

臨海洪頤煊

漢書河間獻王傳所得周官尙書禮禮記其稱禮卽禮經今之儀禮是也禮記卽大小戴記梅福傳禮記孔子曰丘般人也小戴記之文後漢書桓郁傳禮記曰天下之命懸於天子天子之善成乎所習云云大戴記之文

負劔辟咩

曲禮上負劔辟咩詔之鄭注負謂置之於背劔謂挾之於旁辟咩詔之謂傾頭與語頤煊案傾頭與語劔

礙於旁故必負劔然後與語史記刺客列傳王負劔
負劔遂拔明無事不負劔也正義負謂致兒背上劔
謂挾於脇下如帶劔也非是

母踏席

母踏席正義踏猶躡也席既地鋪當有上下將就坐
當從下而升當已位上不發初從上從上爲躡席也
玉藻云升席升席不由前爲躡席也頤煊案今玉藻
作登席不由前爲躡席古鼠葛同聲故從鼠之字多
從葛躡或作躡亦古今字說文踏一曰躡踏非躡義
踏疑卽躡字之譌

授坐不立

授立不跪授坐不立釋文授坐本又作俛仰頤煊案
鄭注爲煩尊者俯仰受之正義俯俛若尊者形短雖
卑者得跪以授之故少儀云受立授立不坐性之直
者則有之也注云尊者短則跪不敢以長臨之是也
注疏並不釋授坐二字之義當從釋文本作授立不
跪俛仰不立爲是少儀性之直者當作生之直者古
字性生通用

汗手

共飯不澤手鄭注爲汗手不絜也釋文汗下半反本
或作汗頤煊案正義絜淨也若澤手手必汗生則不
絜淨一本汗生不圭圭絜也言手澤汗飯也正義所

見兩本與釋文同鄭注澤謂倭莎也詩葛覃薄汗我私毛傳汗煩也鄭箋煩煩攔之釋文阮孝緒字畧云煩攔猶倭莎也鄭注當作汗字

玄武四象

行前朱鳥而後玄武左青龍而右白虎頤煊案考工記斡人龍旗九旂以象大火鳥旗七旂以象鶉火熊旗六旂以象伐龜蛇四旂以象營室龍卽青龍鳥卽朱鳥熊虎爲旗故西方亦作白虎漢碑畫玄武皆作龜蛇象其命名之義不可曉正義玄武龜也龜有甲能禦侮用也而不及蛇後漢書馮衍傳李賢注位在北方故曰玄身有鱗甲故曰武皆臆說

卹勿

國中以策彗卹勿鄭注卹勿搔摩也頤煊案卹勿卽密勿漢書劉向傳密勿從事詩十月之交作黽勉從事爾雅釋詁蟲沒勉也皆同聲通用字此與下驅塵不出軌對言之言國中但以策彗微勉不令塵揚正義卹勿者以策微近馬體不令欲疾也得其義矣

男女相荅拜也

曲禮下男女相荅拜也釋文相荅拜一本作不相荅拜皇云後人加不字耳正義俗本云男女不相荅拜禮男女拜悉相荅拜則有不字爲非頤煊案禮男女拜悉相荅拜者是言其親此汎言男女當是其疏遠

者故鄭注嫌遠別不相荅拜以明之據鄭注當有不
字

食力

問大夫之富曰有宰食力鄭注食力謂民之賦稅頤
煊案力當作仿王制祭用數之仿喪用三年之仿皆
謂有餘

國君綏視

國君綏視鄭注綏讀爲妥妥視謂上於裕頤煊案視
上於裕不可謂妥妥綏當爲綏周禮夏采鄭注士冠禮
及玉藻冠綏之字故書亦多作綏者冠綏結於項謂
在衿之上而之下也

華而睨

檀弓上華而睨大夫之簀與鄭注說者以睨爲刮節
目字或爲刮釋文孫炎云睨漆也頤煊案考工記刮
摩之工鄭注故書刮作捥鄭司農云捥讀爲刮故鄭
注以睨爲刮節目說文垸以漆和灰而髹也此卽孫
炎所本

畏

死而不弔者三畏鄭注人或時以非罪攻已不能有
以說之死之者孔子畏於匡頤煊案白虎通喪服篇
畏者兵死也通典引盧植注畏兵刃所傷周禮冢人
凡死於兵者不入兆域鄭注戰敗無勇投諸塋外以

罰之畏謂畏怯戰敗而死故不弔

正丘首

狐死正丘首鄭注正丘首正首丘也正義所以正首而嚮丘者丘是狐窟根本之處雖狼狽而死意猶嚮此丘頤煊案丘首當作北首下文葬於北方北首三代之達禮也之幽之故也禮運故死者北首生者南鄉皆從其初狐死亦北首記引之以證不忘其本丘古文北與北字形相近因譌作丘首

爵弁紵衣

天子之哭諸侯也爵弁經紵衣鄭注天子至尊不見尸柩不弔服麻不加於采此言經衍字也頤煊案白虎通崩薨篇禮檀弓曰天子哭諸侯爵弁純衣無經字

儼然

檀弓下雖吾子儼然在憂服之中頤煊案詩澤陂碩大且儼說文引作碩大且媿儼卽讀如諒闇之闇儼然謂在諒闇中也雜記疏衰皆居堊室不廬廬嚴者也嚴儼古字通用

裘氏

與之邑裘氏頤煊案莊子列御寇篇鄭人緩也呻吟裘氏之地水經渠水注沙水又東逕陳留縣裘氏鄉裘氏亭西陳留風俗傳曰陳留縣裘氏鄉有澹臺子

羽家

馘或爲國

王制以訊馘告鄭注馘或爲國頤煊案周禮蝮氏鄭注鄭司農云蝮讀爲馘說文馘重文作蝮隸釋斥彰長田君碑討馘畔夷國卽馘字之省

昆蟲

昆蟲未蟄鄭注昆明也明蟲者得陽而生得陰而藏頤煊案大戴禮夏小正昆小蟲昆者衆也衆蟲何以謂之昆蟲說文周人謂兄曰鬻从弟从衆與衆字形相近因譌作昆

今月令

月令鴻雁來鄭注今月令鴻皆爲候正義今月令者月令出有先後入禮記者爲古不入禮記者爲今則呂氏春秋是也頤煊案說文引明堂月令蔡邕月令章句與此注今月令皆後漢單行本非呂氏春秋

九門

毋出九門鄭注天子九門者路門也應門也雉門也庫門也臯門也城門也近郊門也關門也頤煊案下文九門磔攘注不言者明與此同也風俗通祀典篇月令九門磔攘以畢春氣蓋天子之城十有二門東方三門生氣之門也不欲使死物見於生門呂氏春秋季春紀高誘注九門三方九門也卽本風俗通皆

與鄭異義

累牛騰馬

乃合累牛騰馬遊牝于牧鄭注累騰皆乘匹之名是月所合牛馬謂繫在廐者其牝欲遊則就牧之牡而合之頤煊案易大壯羸其角釋文蜀才作累姤羸豕孚躅躅釋文陸云羸讀爲累廣雅釋言羸瘠也累牛謂病牛說文一曰騰牯馬也乃合累牛騰馬謂繫其病者牯者於廐餘則皆遊牝於牧卽周禮牧師所謂中春通淫也鄭注以累騰皆乘匹之名失之

遠之於成均

文王世子謂之郊人遠之鄭注遠之者不曰俊選曰郊人賤技藝頤煊案遠之當作達之屬下於成均爲句言達之於成均以及取爵於上尊也義亦得通

櫓巢

禮運夏則居櫓巢山井鼎考文古本櫓作櫓頤煊案太平御覽卷五十五引禮記作櫓家語問禮篇亦作櫓釋名釋兵櫓露也露上無屋覆也左氏成十六年傳楚子登巢車以望晉軍杜注巢車車上加櫓正義引說文云輶兵高車加巢以望敵也櫓澤中守草樓也巢與櫓皆樓之別名今本作櫓傳寫之譌

不獮

鳳以爲畜故鳥不獮鄭注獮狝飛走之貌也錢氏大

所荅問獠爲鳥飛不應從犬旁釋文獠本作喬周禮
大司樂注引此文亦作喬俗本從犬者誤也說文走
部有趨字訓狂走卽鳥不喬之喬張衡東京賦捎魑
魅斲獠狂薛綜注獠狂惡厲之鬼名埤蒼云獠無頭
鬼也喬本有狂義因喬狂連文并喬字亦加犬旁猶
展轉之展作輾鉄質之質作鑽也頤煊案獠本作鵠
詩晨風鳩彼晨風毛傳鳩疾飛也韓詩作鵠彼晨風
喬卽鵠字之省後人誤加犬旁作獠字

筠

禮器如竹箭之有筠也正義筠是竹外青皮顧命云
敷重筍席鄭云筍析竹青皮也禮記曰如竹箭之有
筠鄭引禮記之筠以爲青皮是知呼竹爲筠頤煊案
聘義孚尹旁達鄭注尹讀如竹箭之筠是鄭以筠爲
竹外青皮筍尹皆筠之借字漢書高帝紀以竹皮爲
冠韋昭曰竹皮竹筠也說文無筠字說文筴竹膚也
从竹民聲筴析竹筴也是析竹皮黃者爲筴皮青者
爲筴筴卽筠字

燔柴於奧

燔柴於奧夫奧者老婦之祭也鄭注奧當爲爨字之
誤也或作竈頤煊案儀禮特牲饋食禮鄭注禮器曰
燔燎於爨夫爨者老婦之祭風俗通祀典篇禮器記
曰燔柴於竈竈者老婦之祭是鄭注所本

往德也

郊特牲束帛加璧往德也正義南本及定本皆作往德北本爲任德頤煊案當作任德禮器束帛加璧尊德也任德與尊德義近

婦盥饋

厥明婦盥饋舅姑卒食婦餽餘私之也釋文一本無婦盥饋三字頤煊案正義厥其也其明謂共牢之明日也舅姑卒食謂明日婦見舅姑訖婦乃盥饋特豚舅姑食特豚之禮竟也正義本無婦盥饋三字

古佩帶

丙則右佩玦捍管帶鄭注帶刀鞞也頤煊案帶無刀鞞之名帶當作帶通作掃字詩葛屨佩其象掃毛傳象掃所以爲飾君子偕老象之掃也毛傳掃所以摘髮也

兔薨

菘苴粉榆兔薨滫瀡以滑之鄭注兔新生者薨乾也正義按庖人云共蠶薨之物蠶薨相對此經以兔對薨薨卽是乾故知兔爲新生此兔薨於周禮據肉爲言熊氏皇氏皆云文承菘苴粉榆之下據菘苴等爲兔薨義或爲然頤煊案儀禮士虞禮記夏用葵冬用苴鄭注夏用生葵冬春用乾苴爾雅釋草蒔菹葵郭璞注頗似葵而小葉狀如藜有毛洵啖之滑兔卽葵

也鄭注以兔爲葵之新生者藁卽乾葵也

不涉不撇

不涉不撇鄭注撇揭衣也正義言於尊所不因涉水不敢揭衣頤煊案曲禮拾級聚足鄭注拾當爲涉聲之誤也周書嘗麥解王涉階不涉不撇謂不涉階則不揭衣正義失之

連用湯

玉藻連用湯鄭注連猶釋也頤煊案連讀如爛淮南天文訓至於連石高誘注連讀腐爛之爛故正義云言釋去足垢而用湯爛也

手足毋移

疾趨則欲發而手足毋移鄭注移之言靡匝也毋移欲其直且正正義移謂靡匝搖動也頤煊案移古通作侈字侈張也

綴兆

樂記綴兆舒疾鄭注綴謂鄮舞者之位也兆其外營域也正義鄮謂鄮聚頤煊案說文鄮聚也又僭最也最古通作聚字漢書叔孫通傳爲綿蕞野外應劭曰立竹及茅索營之習禮儀其中也蕞卽最字

肉好

寬裕肉好順成和動之音作而民慈愛鄭注肉肥也正義肉謂厚重者也頤煊案爾雅釋器肉倍好謂之

璧好倍肉謂之瑗肉好若一謂之環肉好謂音之大
小得其中

石聲磬

石聲磬鄭注磬當爲罄字之誤也正義其字下著石
樂器之磬其下著缶是罄然之罄今經云石聲磬恐
是樂器故讀爲罄取聲音罄罄然頤煊案史記樂書
作石聲磬說文磬籀文作磬論語磬磬然小人哉亦
謂磬聲磬卽磬字

公羊賈

雜記下鑿巾以飯公羊賈爲之也頤煊案公羊賈疑
卽論語公明賈明古讀如芒與羊聲相近春秋家公
羊高亦卽孟子所謂公明高也

鷺彌

中路嬰兒失其母焉何常聲之有鄭注嬰猶鷺彌也
言其若小兒亡母啼號安得常聲乎所謂哭不偯頤
煊案釋名釋長幼人始生日嬰兒或曰嬰媿嬰是人
也媿其啼聲也鷺彌嬰媿皆卽偯字雙聲

其名者成

凡宗廟之器其名者成則釁之以豶豚鄭注宗廟名
器謂尊彝之屬頤煊案名卽銘字周禮小祝置銘鄭
注銘今書或作名儀禮旣夕取銘置於重鄭注今文
銘皆作名祭統銘者自名也自名以稱揚其先祖之

美而明著之後世者也故尊彝之屬有銘者成則皆
釁之

一溢米

喪大記朝一溢米莫一溢米鄭注二十兩曰溢於粟
米之法一溢爲米一升二十四分升之一頤煊案後
漢書南蠻傳計人稟五升李賢注古升小故云五升
三國志裴松之注引魏氏春秋諸葛公所噉食不過
數升司馬宣王曰亮將死矣故朝升米暮升米爲最
少之數

輝

祭統夫祭有畀輝胞翟闔者惠下之道也鄭注輝周
禮作鞞謂鞞磔皮革之官頤煊案考工記鞞人爲臯
陶祭時不聞有此官下文輝者甲吏之賤者也疑執
燭兵士之屬

興舊

興舊者欲作率慶士鄭注言文叔能興行先祖之舊
德起而循其善事頤煊案舊當爲觀字之譌說文觀
古文作舊與舊字形相近興觀者欲謂能省視其嗜
欲以作率其卿士慶古卿字

夫婦之道苦

經解故昏姻之禮廢則夫婦之道苦而淫辟之罪多
矣鄭注苦謂不至不荅之屬頤煊案爾雅釋詁苦息

也夫婦之道止息謂無以別嫌明微故淫辟之罪多
愾乎

哀公問君行此三者則愾乎天下矣鄭注愾猶至也
頤煊案愾當作忤與迄字通用爾雅釋詁迄至也詩
生民以迄於今毛傳迄至也鄭本作則忤乎天下矣
故注忤猶至也家語大婚篇作愾王肅注愾滿也說
文愾太息也滿當卽懣字之省

下天上施

坊記上酌民言則下天上施鄭注酌猶取也取衆民
之言以爲政教則得民心得民心則恩澤所加民受
之如天矣言其尊頤煊案天當爲先緇衣惟尹躬天
見於西邑夏鄭注天當爲先玉篇禿古文天字與先
形相近謂上取民言則下先施於上故下文云故君
子信讓以涖百姓則民之報禮重卽所謂下先上施
也

卷石

中庸一卷石之多鄭注卷猶區也頤煊案卷讀如圜
聚之圜省作卷故鄭注猶區也詩有卷者阿毛傳卷
曲也亦是此義或讀作拳者失之

歸乎

表記子言之歸乎君子隱而顯正義於時孔子身在
他國不被任用故稱歸乎頤煊案歸當通作歸字歸

乎屬君子句讀莊子天下篇歸然而有餘郭象注歸然獨立自足之貌歸乎君子猶言巍乎君子是美其德獨立之辭

必見其敝

緇衣苟有車必見其軾苟有衣必見其敝鄭注敝敗衣也衣或在內新時不見王氏引之經義述聞此言行之必成而以衣之必敗爲喻則爲不倫且與引詩之意不合頤煊案敝古通作蔽字謂蔽膝也蔽膝謂之鞞亦作紼玉藻一命緼鞞黝衡鄭注鞞之言亦蔽也白虎通紼冕篇紼者蔽也軾車前橫木蔽膝亦在衣前其義一也

芣翦不納

間傳芣翦不納鄭注芣今之蒲萍也頤煊案說文芣地黃也禮曰鉞毛牛藿羊芣豕薇今公食大夫禮作羊苦鄭注苦苦菜也並不爲蒲萍芣當是萃字之譌萃萍古字通用故鄭注萃今之蒲萍也說文翦蒲子可以爲平席釋名釋牀帳蒲平以蒲作之其體平也故正義云蒲平爲席也

楷適

儒行適弗逢世正義適之也謂已之生於澆薄之時不逢明世也頤煊案適當屬上句讀後世以爲楷適呂氏春秋下賢篇帝也者天下之適也高誘注適主

也

厭然

大學見君子而后厭然鄭注厭讀為廐閉藏貌也正
義見君子而後乃厭然閉藏其不善之事宣著所行
善事也頤煊案如正義閉藏是釋下文揜字非釋厭
然周禮天官序官鄭注奄精氣閉藏者厭與奄同故
其貌如之

僎

鄉飲酒義介僎象陰陽也鄭注古文禮僎皆作遵頤
煊案僎遵字形相近僎當作俊古從尊從夂字多
通用字林跋古蹲字方言遵俊也疑即本於禮經少
儀僎魯鄭注僎或為馴馴亦與俊字通用因俊後轉
作僎

縝密以栗

聘義縝密以栗鄭注栗堅貌頤煊案山海經西山經
瑾瑜之玉為良堅栗精密郭璞注說玉理也禮記曰
璵密似栗玉有栗文所謂穀璧也義亦得通

大戴稱逸禮

後漢書輿服志補注引逸禮王度記曰天子駕六馬
諸侯駕四大夫三士二庶人一通典卷五十九太古
男子五十而娶女二十五而嫁中古男子三十而娶
女二十而嫁逸禮本命篇云此皆大戴禮文大戴不

立學官故稱逸禮太平御覽卷五百三十七引禮記
逸禮卷五百四十引大戴禮逸禮逸禮卽大戴禮非
篇名

諡法篇

隋書經籍志大戴禮記十三篇注云梁有諡法三卷
後漢安南太守劉熙注亡頤煊案大戴禮本有諡法
篇見白虎通北堂書鈔卷九十三引大戴禮諡法其
時尙未亡太平御覽卷五百六十二引大戴禮曰周
公旦太師望相嗣王作諡法一段與周書諡法篇同
劉熙諡法注

玉海引沈約諡法序云劉熙注諡法唯有七十六名
又云劉熙注解時或有所發明頤煊案宋蘇洵諡法
解多引劉熙注一切經音義卷二十引諡法曰賤而
得幸曰嬖釋名云嬖卑賤婢妾媚以色事人得幸者
也今釋名無此文是劉熙諡法注文選景福殿賦李
善注引劉熙孟子注獻猶軒軒在物上之稱也亦是
諡法注皆後人誤改

發齊

禮三本大昏之未發齊也孔氏廣森補注發始也昏
禮將親迎必先齊音齋頤煊案史記禮書發作廢廢
發古字通用齊當作濟儀禮士昏禮皆振祭濟肝宋
張淳儀禮識誤引釋文濟作齊云從口者後人加之

未廢齊謂合卺卒食以前

哭不文

三年之哭不文也頤煊案史記禮書作不反文反皆當爲儗字之譌孝經喪親章孝子之喪親也哭不儗唐明皇注氣竭而息聲不委曲禮記間傳大功之喪三曲而儗鄭注三曲一舉聲而三折也楊倞荀子注不文謂無曲折也亦當作儗字

有司參夙興

保傅有司參夙興端冕見之南郊盧辯注參職謂三月初也孔氏廣森音義參夙興漢書新書並作齊肅通解云參乃齊字之誤而注文職字亦誤頤煊案禮

記內則國君世子生二月之末擇日妻以子見於父男女夙興沐浴古三字作參盧本當作參字據注參下當有脫字

達其不及

太傅罰其不則而達其不及頤煊案達當讀作撻禮記文王世子成王有過則撻伯禽所以示成王世子之道也下文則有司過之史盧注太子齒於學有榎楚之威亦謂撻也

宴瞻其學

天子宴瞻其學賈誼新書作天子燕辟廢其學頤煊案瞻當從耳作瞻宴瞻卽燕耽與燕辟義近下脫廢

字後漢書百官志補注引賈生作燕業反其學業辟
字形相近反卽廢字之譌

已諾

應羣臣左右不知已諾之正孔氏補注已諾猶然諾
也頤煊案文王官人篇已諾無斷已止也諾許也謂
止其所當止許其所當許斯爲正也淮南說林訓諾
之與已相去千里

往者不慎

曾子立事來者不豫往者不慎也盧注慎故於物來
者不猶豫往者無所慎頤煊案慎當作悔禮記儒行
往者不悔來者不豫盧注本云慎故於物來者不猶

豫往者無所悔若作慎字注中下慎字義不可通經
注兩慎字皆涉注中上慎字而譌

及親

曾子制言上殺六畜不當及親吾信之矣使民不時
失國吾信之矣頤煊案及親當作失親禮記玉藻君
無故不殺牛大夫無故不殺羊士無故不殺犬豕殺
六畜不當其禮則失親愛之心失親失國對言之

机銘

武王踐阼於机爲銘焉机之銘曰皇皇惟敬口生咥
口戕口頤煊案机當爲机字之譌說文机亦古文簋
盛黍稷器故銘辭從口取義

擾阻

戶之銘曰擾阻以泥之若風將至必先搖搖孔氏補注泥之似謂墜戶也擾阻未詳頤煊案擾當爲擾字之譌服虔漢書音義擾古之善塗墜者也爾雅釋詁阻難也謂泥塗不善風至必敗也

明不可弊

子張問入官所見邇故明不可弊也孔氏補注所不見者無強爲明則明之用不窮也頤煊案弊卽蔽字左氏襄二十七年以誣道蔽諸侯釋文蔽本作弊莊子逍遙游篇孰弊弊焉釋文弊司馬本作蔽古字通用

陽當作傷

文王官人喜氣內畜雖欲隱之陽喜必見怒氣內畜雖欲隱之陽怒必見欲氣內畜雖欲隱之陽欲必見懼氣內畜雖欲隱之陽懼必見憂悲之氣內畜雖欲隱之陽憂必見頤煊案五陽字皆當作傷詩澤陂傷如之何爾雅釋詁郭璞注引作陽如之何陽傷古字通用謂氣雖內畜若有所傷感則必見於外也

推前惡忠

推前惡忠府知物焉盧注謂有詢義之攻其所不知者則推援於人而待以爲忠府而形貌又如曉然也頤煊案府聚也物是惣字之譌古總字謂推前惡於

人則自以爲忠聚智總與下句首成功少其所不足
謂先人成功又鄙薄其所不足文義相對周書官人
篇前總唱功卽隱括此二句之義

遠於年

公冠祝雍曰使王近於民遠於年孔氏音義年說苑
作佞後漢志注引此文云近於民遠於年遠於佞頤
煊案佞讀如年左氏襄三十年經天王殺其佞夫公
羊作年夫遠於年卽遠於佞同聲假借字劉昭補注
所引遠於年下重出遠於佞三字是後人妄加

徹昫

易本命三月而徹昫然後能有見盧注昫精轉視貌
徹或爲微也頤煊案昫卽眇字說文作矐云兒初生
瞥者从日叕聲瞥一曰財見也纔見與微字義近眇
矐同聲字



